

Dal Comprenjorie al Comun General de Fascia

Ai 16 de mé 2010 jon a litèr per la pruma outa la neva istituzion aministrativa de val



Co la Lege provinciàla dai 10 de firé 2010, n. 1, l'Consei de la Provinzia autonoma de Trent à aproà l Statut del "Comun general de Fascia", passà dal colege di ombolc e aproà dai consees di comun de Fascia.



La litazioni per l Comun General les vegn metudes a jir dessema con cheles di consees di comun e cuscita ai 16 de mé che vegn la popolazion fascèna, apede che per so comun, la sarà chiamèda a se palesèr ence per sia comunità de val; più avisa per l "Comun General de Fascia".

La cognarà jir a litèr diretament l "Procurador" e nef membres del "Consei General". A chest nef ent

la Provinzia ge passà n mingol a l'outa n muie de doeres e funzions, ence chi che atualmenter vegn porté inant dal Comprenjorie.

I orghegn litè da la popolazion del "Comun General de Fascia"

L PROCURADOR: con chesta parola, che la vegn cà dai documenc antiches de la "Comunità de Fascia", vegn identificà l raprezentant ofizial del Comun General de Fascia; l vegn lità diretament da la jent de un soul teritorie che l corespòn al tegnir di comun de Fascia.

Competenzes del Procurador: ge speta duta la funzions pervedudes dal statut del C.G.F. e ence duta cheles che ge pervegn ai President de la comunitàes de val:

- l nomina i membres de l'esecutif, più avisa del "Consei de Procura" (no più che 6);
- l chiama ite e l rec l "Consei de Procura" e l "Consei di Ombolc";

• l raprejentà l C.G.F. te la "Conferenza de la Mendranzes" e tel "Consei de la autonomies locales".

L CONSEI GENERAL: l dombra 31 membres, l corespòn a l'assemblea de l'ent, l'é l'orghen più democratic e raprejentatif de la comunità, l perveit la nomina de n so President delaite de so gremen col doer de chiamèr ite la sentèdes e de rejer i lurieres.

L Consei general l vegn metù ensema cuscita:

- 9 conseieres litè diretament da la popolazion, l de chisc sarà l prum candidat Procurador no lità a chesta encèria;
- 7 Ombolc di comun de Fascia;
- 14 conseieres nominé dai consees de comun; ogne comun

nomina doi componenc, un de chisc l cogn esser esprescion de la mendranza del consei;

- l Procurador lità diretament da la jent de Fascia.

Competenzes del Consei General:

- regolamenc, ac e pians de direzion e programazion che i à valuta generèla per duta la val;
- ac de carater generèl su tematches de emportanza locala desche la defendura e l stravardament del patrimoni storich, la defendura e la promozion del lengaz ladin, l volontariat sozièl, con ence i studafech;
- mozion de censura al Procurador o ence a un singol component del Consei de procura.

I etres orghegn del "Comun General de Fascia"

L CONSEI DI OMBOLC: l tol ite i 7 Ombolc di comun de Fascia con a cef l Procurador che l'ence l doer de l chiamèr ite. Chest organism l ge somea a la "Conferenza di Ombolc" de ades, con funzions soraldut de carater "politic", più avisa de cordanza e coordenament anter l Comun general de Fascia e la amministrazioni de comun. L'é n organism con na valuta de carater propositif e de "direzion politica", en particulèr so doer sarà chel de portèr dant proponetes al Consei general en cont de chisc argomenc:

- ac de direzion de carater generèl;
- pians, programes, modie de cordanza de valuta generèla per duta la val;
- ac generèl per la gestion

unitèra di servijes;

- projet de gestion unitèra de la funzions pervedudes dal statut.

L CONSEI DE PROCURA: l tol ite l Procurador, che l'ence a cef de chest organism e l' l doer de l chiamèr ite, e da etres componenc da el enstes nominé, ma no più che sie; chisc i pel vegnir nominé ence al de fora del Consei general.

Chest Consei l'é l'orghen esecutif del Comun general de Fascia, chel che cognarà lurèr e se dèr jù per arjonjer i fins e i obietives che ge vegn metù dant dal Consei general.

Amò apede, a chest orghen ge pervegn duc chi doeres e chela funzions che l statut no ge resserva avisa ai etres orghegn del Comun general.

Coche se cogn litèr per l "Comun General de Fascia"

L statut met dant che la litazioni del Consei general e ence del Procurador del C.G.F. les cogn vegnir fates dessema co la tornèda generèla per la litazioni di consees di comun e di ombolc. Per chesta rejon ai 16 de mé ogne litador de Fascia l sarà chiamà a dèr sia stima con 2 zedoles: una - de color sal - per l comun olache se cogn dèr jù la stima per l'ombolc e per i

conseieres de comun (no più che doi preferenzes); e na seconda zedola - de color vert - olache se cogn dèr jù la stima per l Comun General de Fascia. Chesta zedola la é spartida te doi pèrts: te la pèrt de sora se cognarà dèr la stima per un di candidat a la encèria de Procurador; e te la pèrt sotite se cognarà enveze scriver ite una preferenza per un demò di candidat a component del Consei general.

ELEZIONE DEL PROCURADOR / LITAZION DEL PROCURADOR	
	DONEI CRISTINA
	FORTANA GINO
ELEZIONE DEL CONSEI GENERAL / LITAZION DEL CONSEI GENERAL	

FAC-SIMILE

La Provinzia de Trent sostegn sia mendranzes linguistiche